

陳三立 著
李開軍 校點

中國近代文學叢書

散原精舍詩文集

下

上海古籍出版社

陳三立 著

李開軍 校點

中國近代文學叢書

散原精舍詩文集
下

上海古籍出版社

圖書在版編目(CIP)數據

散原精舍詩文集 / 陳三立著; 李開軍校點. — 上海:
上海古籍出版社, 2003. 6
(中國近代文學叢書)

ISBN 7—5325—3304—2

I. 散... II. ①陳... ②李... III. ①詩歌—作品集—
中國—近代 ②散文—作品集—中國—近代 IV. I215.02

中國版本圖書館 CIP 數據核字(2003)第 011089 號

全國古籍整理出版規劃領導小組資助出版

中國近代文學叢書

散原精舍詩文集

(全二冊)

陳三立 著

李開軍 校點

上海古籍出版社出版、發行

(上海瑞金二路 272 號 郵政編碼 200020)

(1) 網址: www.guji.com.cn

(2) E-mail: guji1@guji.com.cn

經銷處 上海發行所發行經銷 上海古籍印刷廠印刷

開本 850×1156 1/32 印張 43.875 插頁 11 字數 702,000

2003 年 6 月第 1 版 2003 年 6 月第 1 次印刷

ISBN 7—5325—3304—2

I · 1587 定價: 100.00 元

如有質量問題, 請與承印廠聯繫。T: 64063949

散原精舍詩別集

余堯衢同年古希偕老圖題句寄祝

窈窕樓臺接海居，紫霞輝暖染衣裾。五噫賃廡鴻光在，下溷歸田陶翟如。以美人倫成教化，自邀天籟與吹噓。逃秦仙眷依詩卷，圖續花源不妬渠。

堯衢寫寄元旦之作依韻和酬

牢落臨溪宅，蹉跎抱古心。老驚殘歲改，醉戀遠鐘沈。雁鷺穿霄避，豺狼擁窟深。猶期烽燧外，鍾嶺映孤吟。

抉目是何年，歸耕恐未然。舊游同偃蹇，吾道倚狂顛。憶汝孤羆坐，傳聲寒雁先。老人星出海，垂照和歌筵。

次韻宗武寓樓對雪

冰淤久壅放溪舫，飛雪銜眉把屈騷。聚想海鷗寒共沒，窺餘梁鼠眩仍逃。天光破碎巢痕曠，堞影淒迷角吹高。煮茗圍花靜樓壁，上衣小火坐人豪。

人日宗武宅讌集賦紀并示坐客吳寬仲同年

鄰巷吟人引酒卮，初逢上日雪消時。濃花照坐驚催發，側帽搖燈欲自奇。醉語漫存人物論，老懷最憶草堂詩。襄陽耆舊風流在，千里蓴羹戀滑匙。

愔仲居杭有詩見懷依韻卻寄

湖上尋山四客同，流馨叢桂夕陽中。倦游已是經時別，活國終憐造物窮。寒雜啼號纏社鼓，醉扶僮僮釣溪風。作鄰居士存吟侶，君與仁先、余與阿兄宗武皆鄰居。兩地騎驢摘小紅。

穀日立春喜晴次和譚芝雲翰林

春動枝頭鳥語催，曉風暖拆雪殘梅。九垓震蕩留吟几，萬象低昂曠酒杯。藩鎮兵猶乘

覺起，海邦使播歆盟回。腐儒把玩微陽復，莫問飢腸破疾雷。

三月十五日偕宗武過倉園看花坐雨初臺依韻同作

幽徑煙肥履迹苔，濕園細雨客能來。穿花魂冷游蜂照，吹葉聲酣卧犬猜。乘興欲呼山入座，作癡猶待月銜臺。光陰窈窕扶吟地，留命傷春賦七哀。

挽陳子青翁

名德窺三世，滄桑老一儒。吟飛鸞鶴氣，道應馬牛呼。孤憤藏杯斝，深居潤畫圖。先朝高兩監，逸事泣彈珠。翁當年應舉屢不遇，與義州李文石齊名，世傳南北兩監。

羈旅聯英胄，依依寄命年。海燈搖寤寐，湖舸脫腥羶。待續移山志，終荒種秫田。魂親林處士，神理雪梅傳。

贈袁伯夔

武烈翊中興，楚材冠當代。文派亦俱昌，沿流等起廢。湘鄉接桐城，雄跨欲無對。羽

翼郭與吳，雲龍瞻進退。湘綺別樹幟，映古紛雜佩。末運稍衰歇，能者猶數輩。袁子生其鄉，霑被篤所愛。壯志逐時傑，縱轡忘歷塊。惘惘終自返，一几八家在。溫故效語言，有穎出荒穢。九霄湛露垂，挹之滋渴肺。此事根孝友，冥漠盈萬態。賤簡豎儒業，孤嚶絕狂吠。我老餘誘子，物外馨馨歎。

閏五月歸張氏女子卧疴滬上嘉定余伯陶主方起之贈以此詩

奔撫孤呻海上樓，藥煙燈穗颯然秋。豈期與物同疵癘，稍欲祈天赦縛囚。癥結竟窺囊底智，風光宛託剡中游。神州莽莽誰醫國，方技餘存第一流。

七月十三日偕寬仲宗武登倉園新樓憑眺至月上

鄰園過雨秋生枝，魂魄踴躍蘇癢疲。襄陽耆舊導我出，亦有柱史相攀隨。突兀樓觀跨溪水，新髻朱紫光葳蕤。並倚欄楯染涼色，萬楊柳插青琉璃。蟬嘶蟲語漏縫隙，澄波濃黛連城陴。游條可數紅蓼底，微欠釣叟蹲孤羸。斜陽如縠覆鍾阜，肌理粲粲顛骨奇。深藏陵墓聳危塔，分晴草樹猶離披。南朝風物賺一瞥，安問烽燧含瘡痍。主人

不歸笑把酒，園丁頗不供茗飲，從宗武家取瓶釀代之。看移大月承罽毼。晚鴉下逐帶橋影，翻弄吟抱鳴筇悲。

寄題湖心寺示慧之上人

淮壖泱泱吹風沙，控勝寫奇一湖好。湖心寺乃成掌故，千歲廢興迹仍寶。中間踵起善知識，吟觴畫几聯諸老。擅場壇坫跨東南，縣縣神理餘叢藁。上人傳衣恢末法，能截齧流資再造。蟠胸龍象出狡獪，磊嵬架構照穹昊。不見旻公三十年，杜陵舊句搖懷抱。上人以丁酉歲別余於長沙，今垂三十年矣。兵戈喋血證初地，分我鐘磬迷魂曉。期挈疚齋訪蔗叟，重接望社萬物表。疚齋如皋冒氏，爲前淮安關監督。蔗叟淮安段氏，爲登八十詩人。望社爲明末遺老會文湖寺所題名。

哭胡瘦唐侍御

隔年鄰寺與追尋，一徑聽鐘絕足音。劫運更教孤氣類，諫書忍問出呻吟。江湖摩盪回天夢，几榻綢繆學道心。收拾誰編獨行傳，島人寫恨海沈沈。謂劉潛樓居青島，爲作狀誌及哀辭。

八月十七夜馬良存吏部讌集初臺玩月

溪臺澹秋痕，雁底坐超忽。萬里霄無雲，木末吐華月。氛掃堞浮浮，輝滿峰兀兀。寫影水精域，望氣金銀闕。叢篠浸寒漪，披颺鏡中髮。列筵出窈窕，應濕凌波鞮。歌吹翻流光，淫魚聽恍惚。濯醉零露新，傳詠遠風歇。余情睠釣磯，何處戰死骨。化宇遺濁世，鐘聲漏林樾。

哭沈乙庵翁

卧病傳句寵稱觥，歸序仍能腹藁成。十日死生逢絕筆，萬流依倚失長城。亂離殘客元同命，博大真人不可名。留詠荆軻一樓影，哀迎終古海濤聲。

方巡視殘菊宗武示曉起獨坐之什因次和

殘菊堆排照曲廊，猶能風底漏微香。朝飢百繞啁啾寂，劫末孤逢意緒長。寫影移添張壁畫，披衣遙認蓋樓霜。吟人自媚雙煙坐，偷笑城頭雁鷺忙。

馮蒿龔同年八十生日詩

江海逢迎蓋世翁，十年長我氣如虹。獨憐夙夜回天願，移誦尫羸續命功。不朽揚雲垂絕業，扶傾宗澤鬱孤忠。列仙儒視人倫表，綽約飄髯酒頰紅。

任公講學白下及北還索句贈別

辟地貪逢隔世人，照星酒坐滿酸辛。舊游莫問長埋骨，大患依然有此身。開物精魂餘強聒，著書歲月託孤呻。六家要指藏禪窟，待卧西山訪隱淪。

爲仲炤丈題何詩孫翁所畫馴鷗園二雪松

留與殘年反覆看，蓋頭雲帶萬鴉蟠。天根一雪埋烽燧，奇骨餘扶石氣寒。
脫手偷摹太古蹤，撐胸孤喻後凋松。冥冥遺世排閭闔，魂出呼騎雙白龍。

題劉聚卿枕雷圖

小大雙忽雷，故事越千祀。伐材奉使中，巧製韓滉始。變亂散唐宮，歷歷興亡史。收

玩幾名流，燕庭資嫁女。奇遇到今世，尤物合兩美。曾登主人閣，拂拭傲綠綺。戲語失瑞山，誰解一彈指。廢拍形歌詩，側聽寧悅耳。擱筆十年間，負諾不媿恥。奈何增二圖，未忘頑似鄙。吾衰卧溪屋，坐閱九鼎徙。強詠無好懷，敢與泰孃比。獨憐枕上人，跂脚接風軌。終期調黃鐘，雌雄鳳吟起。

題趙叔雍高梧軒圖

誓卜幽居傍湖曲，畫手設施無不足。挺立長梧涼壓屋，旁羅矮細千竿竹。層層都活石氣中，夜卷秋聲入吟腹。樓臺窈窕出晴雨，山水氤氳界邊幅。應帶坡公葑草隄，恍接逋仙梅花麓。英妙少年亦癡絕，要令夢染靈峰綠。異時朱況兩禿翁，攜訪賡歌任沈陸。朱況謂彊邨、夢笙兩詞客。

題松月居士印集

周漢而還垂璽印，儒學摹輯轉相競。頗闕元明迄當代，失寶遺珠亦其病。成哲親王雅嗜古，列詒晉齋最稱盛。保延數葉邁崩圯，漸易鹽米辱題評。居士聲名老畫師，目覩散落

淚欲迸。購收挾取增未備，絕藝奇能送輝映。文何家法沿革存，天壤流傳此後勁。論世應憐別懷抱，摩挲孤躅百靈盟。

題吳靜盦寒匏移圖

閱世皇王去如矢，舊都猶繫夢魂底。九衢車馬葬氛霾，誰解低眉映窗紙。光怪圖書四壁間，況接風流趙管間。如山憂患不到處，高致幽情獨掩關。

題周養安篝燈紡讀圖

梧几起哀音，披圖盪胸臆。附以熙甫狀，慘澹孤兒筆。維母丁窮屯，影事懸歷歷。機聲讀書聲，依倚中夜泣。賢豪基樹立，一燈輝其國。新說改家範，孰念放而失。兒味保恩勤，人紀有膠漆。

題歐陽南雷詩卷

汚人塵昏昏，風雲掩飄忽。燕市起悲歌，孰得建安骨。騷壇有飛將，挾句探月窟。影

蔽芙蓉旗，輝滿金銀闕。下士仰之笑，但解守株橛。

【校記】

此詩《南雷詩草》（一九二三年影印本）卷首題作「南雷詩卷題詞并序」，爲散原手迹。序云：「往余居金陵，傳吉水歐陽南雷留學日本還，起軍旅有功，尋不得志於世，攻詩自娛。詩嗜曹子建，爲之輒效其體，心竊異之。夫子建詩情摯而聲烈，爲變風小雅之遺。同時諸子，獨王仲宣差相類，越代劉越石鮑明遠，大抵氣脈節奏亦其所自出也。厥后欲問津而涉其藩者，天壤寥寥矣。乃獲觀南雷此卷，磊砢恢疏，直抒胸臆，厲氣樹骨，無復齊梁間藻績侈靡之習，則其力追神契，固自有在。子建雖不可及，不得謂非進取之狂者也。諷誦讚嘆，綴以茲篇。」

三月十日譚芝雲翰林招同徠之宗武諸君靈谷寺看牡丹

靈窟負花辰，夢痕浣層疊。荏苒春復還，僧約乃如謀。提攜缺望儔，輕車騁蹀躞。馳道擁奇峰，晴郊明新葉。山門穿幽深，列松對張鬣。前導烏鵲呼，反顧狐兔蹶。丈室聚蜂聲，叢朵初鏤鏤。盛鬻態婀娜，光影諸天接。照席紅盤盃，蔬筍馨七椀。主人爲花壽，澆酒促步履。吟魂與雜併，栩栩莊周蝶。吾曹偶逃世，洗心博暈頰。談舌翻色空，箭鋒脫殼捷。

大千安所殉，俄頃留媚曆。茗罷尋遺墟，犖确杖妥帖。終古巖壑尊，吐氣自扶挾。草風吹靈墳，萬化赴冥攝。歸徑蒼靄垂，微陽寫城堞。

題于省吾山居讀書圖

玩世窮年簿領間，茅庵佳處託荆關。藏身一影如文豹，霧雨層層海上山。

壽吳寬仲同年六十有九

八荒蹄跡接紛紛，轉徙餘生我與君。似水流年融過二，摩天巨刃甫超羣。收身虎穴黃冠返，照影鷗波翠袖分。了卻公家付兒輩，支頤看度北山雲。

庸庵同年於甲子重九集飲浦江高樓有詩紀事依韻奉酬

寄命湖船帶夢游，又依海客戀殘秋。楹書壁挂成千劫，波影花光聚一樓。映照須眉能玩世，支離皮骨故工愁。持杯各在飛鴻側，咽入天風與唱酬。

辟地沈冥一世豪，袖攜大句壓驚濤。炊連烽燧衣痕污，雲卷啼號海氣高。物外歲時猶

可記，道旁骹骹待誰褒。逢辰負盡東籬菊，贏得霜顛倚檻搔。

袁伯夔母唐太夫人八十壽詩

昔誦中壘傳，首揭賢明號。邦國繁污隆，匪獨承家要。復哉成周盛，致治極胎教。昏風淪世族，舊典久不耀。踰檢弛禮防，靡靡趨輕躁。維俗獲女宗，其德凝且劬。采蘋佐勤勞，斷機示則儆。寤寐絕紛華，衆逐無一蹈。溫息階樹榮，冲襟海雲照。氛祲盪摩間，元精自戀嫪。誘兒媚文學，屏世隱霧豹。此事長相娛，天鑒神所勞。

壽王息存翁八十

劫灰不浣列仙儒，吐海朱霞影白鬚。絕學補苴秦博士，老謀填撫漢番禺。坐盟彝鼎寒兵氣，道出羲皇結酒徒。安用養生求四印，胸中書味已如酥。

挽左南孫

結鄰湖曲笑啼同，酒聖詩豪落眼中。出管名山非俗吏，竟戕狂藥問天公。陪游忍憶僧

牀對，娛老翻悲子舍空。牘檢遺編儕作者，流傳猶識故家風。

挽陳石遺翁長男公荆

殘年未減思兒淚，今與而翁共此悲。我祇吞聲延氣息，而翁猶及費文辭。互爲藥誤天難問，獨許才強世所期。料得九冥憐二老，兵戈相望更何之。

壽曾重伯六十

拏芳逐臭般游歲，潭叟矜誇得聖童。睥睨神州換歌哭，盪摩綵筆爛虛空。九流匿腹雷聲出，萬象堆眉嶽氣通。老去求田尊健婦，傲予遜作富家翁。

次韻倦知同年病起

倚海樓欄許養疴，田園挂夢飲誰何。藥香斷續鼠爲伴，兵氣沈浮鳥不歌。自警癡懷虞夏沒，猶擎大句杜韓多。至人息踵滋靈液，宛挺孤松悅澗阿。

庸庵同年賦詩見懷時眼中兵起先發襲擊感而次韻答所寄

跡疏叢桂嶺，待菊發華滋。貪接高人躅，翻傳幼婦詞。海霞輝寤寐，湖葑亂愁思。辟世存杯酒，休論惠與夷。

覆國迎千劫，移家續一年。飽颺鷹已怒，突出蟻相連。氣奪揚塵道，冤攀掌夢天。弄戈對把筆，留命作癡顛。

次和倦知翁近感

過師枕席萬全不，遮道壺漿孰獻酬。行帳雲垂尾閭海，前鋒塵接秣陵秋。從來崩坼成兒戲，贏得荒唐寫客愁。一老觀星揩淚眼，欃槍斜指少微留。

庸庵寄示重九海樓讌集之作適是夕飲仁先湖上宅放舟泛月而歸次其韻答之

動搖海色危樓上，隔歲聽潮惜此筵。故老依然誇勝會，哀歌欲絕是何年。花光肯照魚